

cam, omnia parochiæ suæ munia sub Metropolitanorum authoritate ob-
eunt. Horum electio, examen, Professio fidei, ordinatio, officium &
authoritas sic paucis describuntur in Concilio * Carthagenensi quarto. ^{a Can. 1. Conc. Carthag. 4.}
[Qui Episcopus ordinandus est, antea examinetur, si natura sit pru-
dens, si docilis, si moribus temperatus, si vita castus, si sobrius, si sem-
per suis negocijs cauens, si humilis, si affabilis, si misericors, si literatus,
si in lege Domini instructus, si in scripturarum sensibus cautus, si in dog-
matibus Ecclesiasticis exercitatus: & ante omnia, si fidei documenta
verbis simplicibus asserat, id est, Patrem, & Filium & Spiritum sanctum
vnum Deum esse confirmans, totamque Trinitatis Deitatem coëssentia-
lem & consubstantialem & coæternalem & coomnipotentem prædicans:
si singularem quamque in Trinitate personam plenum Deum, & totas tres
personas vnum Deum: si incarnationem diuinam non in Patre, neque in
Spiritu sancto factam, sed in Filio tantum credat: vt qui erat in diuinitate
Dei Patris Filius, ipse fieret in homine hominis matris filius, Deus verus ex
patre, homo verus ex matre; carnem ex matris visceribus habens, & animā
humanam rationalem: simul in eo ambæ naturæ, id est Deus & homo, vna
persona, vnus Filius, vnus Christus, vnus Dominus creator omnium quæ
sunt, & author, & Dominus, & rector cum Patre & Spiritu sancto, om-
nium creaturarum: qui passus sit vera carnis passione, mortuus vera corpo-
ris sui morte, resurrexit vera carnis suæ resurrectione, & vera animæ resum-
ptione, in qua veniet iudicare viuos & mortuos. Quærendum etiam ab eo,
si noui & veteris Testamenti, id est legis & Prophetarum, & Apostolorum,
vnū eundemque credat authorem & Deum: si Diabolus non per conditio-
nem, sed per arbitrium factus sit malus. Quærendum etiam ab eo, si credat
huius, quam gestamus, & non alterius carnis resurrectionem: si credat iu-
diciū futurum, & recepturos singulos pro his quæ in carne gesserunt, vel
pœnas vel gloriam: si nuptias non improbet: si secunda matrimonia non
damnet: si carnum perceptionem non culpet: si poenitentibus reconcilia-
tis communicet: si in baptismo omnia peccata, id est, tam illud originale
contractum, quàm illa quæ voluntariè admissa sunt, dimittantur: si extra
Ecclesiam Catholicam nullus saluetur. Cùm in his omnibus examinatus
inuentus fuerit plenè instructus, tunc cum consensu Clericorum & laïco-
rum, & conuentu totius prouinciæ Episcoporum, maximèque Metropoli-
tani vel authoritate vel præsentia ordinetur Episcopus. Suscepto in nomine
Christi Episcopatu, non suæ delectationi, nec suis motibus, sed his Patrum
diffinitionibus acquiescat. In cuius ordinatione etiam ætas requiratur, quā
sancti Patres in præligendis Episcopis constituerunt.

Episcopus cùm ordinatur, duo Episcopi ponant & teneant Euangelio-
rum codicem super caput & ceruicem eius: & vno super eo fundente bene-
dictionem, reliqui omnes Episcopi qui adsunt, manibus suis caput eius
tangant. ^{Can. 2. eiusdem Conc.}

Non longe ab Ecclesia Hospitiolum habeat.

Vilem suppellectilem & mensam ac victum pauperem habeat, & digni-
tatis suæ authoritatem fide & vitæ meritis quærat. ^{Can. 14. eiusdem Conc. Can. 15. eiusdem Conc.}

Gentilium libros non legat, Hæreticorum autem pro necessitate & tem-
pore. ^{Can. 16. eiusdem Conc.}